

**Dekretu -Lei n. ° 09/2009,**

**Loron 18 fulan Fevereiru**

**LEI ORGANIKA POLÍZIA  
NASIONAL TIMOR-LESTE  
(PNTL)**

Krize ne'ebé destroi ita nia rai iha fulan Maiu 2006 kria efeitu ne'ebé boot iha Polisia Nasionál Timor-Leste (PNTL) nia laran no Númeru boot husi efektivu haketak an no abandona sira nia postu.

Ita bele haree katak modelu polisia ne'ebé iha hafoin harii PNTL la tuir realidade Timor nian no presiza halo revizaun kle'an ida ba nia Lei Orgánika hodi fó kapasidade Operasionál boot liu ba polisia, no kadeia de komandu ne'ebé efikás iha ierarkia ne'ebé iha definisaun klaru nia laran.

Mantein nafatin prinsípiu sira kona-ba polisia komunitáriu iha filozofia polisiamentu nian, ne'ebé iha privilejiu atu halo patrullamentu ne'ebé hakbesik ba povu, agora buka mós katak PNTL hetan karater ida ne'ebé forte liu kona-ba organizaun, dixiplina, instrusaun no estatutu pesoál nian, no iha área hirak ne'e iha natureza ne'ebé hanesan ho militar nian.

Dispozisaun foun ne'e la iha hanoin atu transforma PNTL atu sai forsa ho natureza militar nian, forsa ne'e sei mantein nafatin misaun ne'ebé la hanesan ho ida ne'ebé entrega ba F-FDTL, ho pontu spesífiku rasik ba polisia, no Forsa Armada maka mantein nafatin hanesan Instituisaun Militar uniku iha Timor-Leste.

No mós atentadu sira iha loron 11 fulan Fevereiru tinan ida ne'e nian, ne'ebé ameasa Estadu de Direitu

ne'ebé estabeselese tuir lei, no nu'udar rezultadu iha koordenaun entre forsa sira defeza no seguransa nian ne'ebé hetan rezultadu di'ak tebes-tebes, ne'e justifika lejislador nia hanoin katak iha nesiedade urjente atu iha ligasaun boot entre PNTL no F-FDTL, no mós ho servisu seguransa seluk hodi kumpre misaun hirak ne'ebé hanesan.

Lei Orgánika PNTL nian tenke hanoin kona-ba realidade foun ne'e, no orienta polisia hodi integra ba Sistema integradu Seguransa Nasionál ne'ebé atu kria iha Ambitu Lei Seguransa Nasionál.

Iha mós hanoin atu integra PNTL iha Sistema Autoridade Marítima, ne'ebé fó kompeténsia espesializadu ba polisia marítima, no iha ezersisiu Autoridade Estadu nian iha Tasi laran, hamutuk ho entidade no ajente seluk Estadu nian.

Tuir termu hirak ne'e, no tuir n° 3 Artigu 115° no aliña d) husi Artigu 116° Konstituisaun Repúblika nian, IV Governu Konstitusionál Dekreta, hodi iha valór nu'udar lei, buat ne'ebé tuir mai:

## **KAPÍTULU I**

### **Prinsípiu Jerál**

#### **Artigu 1° Natureza no Misaun**

1. Polisia Nasionál Timor-Leste, ho abreviatura PNTL, forsa seguransa ida ne'ebé iha Misaun atu defende legalidade demokrátiku, garante seguransa sidadaun no bens nian no proteje direitu sidadaun nian tuir termu ne'ebé estabeselese iha Konstituisaun no iha Lei sira.
2. Tuir estratéjia no filozofia polisiamentu nian PNTL iha

karakterístika polísia komunitária, maski nia organizesaun, dixiplina, instrusaun no estatutu pesoál nian sei tuir natureza militár, PNTL sei la konstitui forsa natureza militár ida.

3. PNTL Independente no hala' o nia knaar eskluзивu ba Estadu .
4. PNTL iha nia personalidade legal rasik no subordinadu diretu ba Ministériu Defeza no Seguransa, no nia organizesaun ida deit ba territóriu tomak.
5. PNTL organiza tuir ierarkia iha nivel hotu-hotu estrutura nian, no nia membru sira obedese (halo tuir) ierarkia komandu nian.

## **Artigu 2º Kompeténsia**

1. Kompeténsia PNTL nian maka hirak ne'ebé hakerek iha lejjlasaun seguransa nasional no seguransa interna nian, ho exesaun ba kazu exesionál kona-ba Estadu de Sítu no Estadu de Emerjénsia, ne'ebé preve iha Konstituisaun, no iha lejjlasaun kona-ba defeza nasional.
2. Tuir kuadru kona-ba objetivu permanente sira ne'ebé defíni iha Lei Seguransa no tuir ámbitu politika Seguransa Interna nian maski labele prejudika atribuisaun (buat ne'ebé simu) legal husi lejjlasaun seluk, objetivu fundamental sira PNTL nian maka:
  - a) Promove kondisaun seguransa ne'ebé garante funksionamentu normal instituisaun demokrátiku nian no ezersisiu direitu, liberdade no garantia sidadaun sira nian;

b) Asegura manutensaun orden, seguransa no trankuillidade (hakmatek)públika;

c) Prevene krime no hahalok seluk ne'ebé kontra lei no regulamentu sira;

d) Hamutuk ho servisu seguransa seluk no defeza, liu-liu ho F-FDTL no ho Servisu Nasional Intelijénsia (SNI) hodi kombate krime organizado no terrorismu;

e) Hamutuk ho estrutura seluk ne'ebé relevante, liu-liu ho F-FDTL no ho servisu Migrasaun garante vijilánsia no fiskalizaun fronteira terrestre no marítima nian no kontrola movimentu ema no sasan nian;

f) Garante no fiskaliza katak tuir lei no regulamentu iha área marítima ne'ebé iha jurisdisaun nasional nia okos, maski la prejudika kompeténsia ne'ebé fó ba entidade seluk ne'ebé tuir ámbitu atribuisaun (buat ne'ebé simu) nian iha Sistema Autoridade Marítima nian, tuir akordu ho Direitu Internasionál no lejjlasaun seluk ne'ebé iha vigór.

g) Promove ezekeusaun asaun sira administrativu nian ne'ebé simu husi autoridade kompetente sira;

h) Hala' o poder ne'ebé simu husi lei kona-ba matéria prosesu penal no, halibur informasaun kona-ba krime, prevene konsekuénsia sira no deskobre ajente sira no atua husi autoridade Judisial ne'ebé kompetente nia okos tuir termu sira lei prosesu penal nian;

i) Liu husi kooperasaun ho SNI no Servisu Informasaun Militár husi F-FDTL, halibur, prosesa no divulga informasaun ho relasaun ba prevensaun no kontrolu krime nian.

- j) Asegura gabinete nasional INTERPOL nian;
- k) Liu husi koordenasau ho Ministériu Infraestrutura, asegura seguransa rodoviária tuir ordenamentu, fiskalizaun no regularizaun tráfehu nian;
- l) Garante seguransa iha espektákulu desportu no eventu seluk;
- m) Liu husi koordenasau ho Ministériu Infraestrutura, no tuir lei, hola parte iha seguransa Aeroportu, Portu no seguransa marítima nian;
- n) Garante seguransa pesoál ba entidade nasional no estranjeiru ne'ebé vizita Timor-Leste
- o) Fornese assisténsia ba populaun no ba vítima sira asidente nian;
- p) Hola parte iha misaun Internasionál tuir kondisaun ne'ebé Governu defini;
- q) Koopera ho forsa no servisu seguransa no defeza nian ne'ebé inkorpora Sistema Integradu Seguransa Nasional, tuir Lei Seguransa Nasional, hodi promove seguransa;
- r) Fó kontribuisaun ba formasaun no informaun kona-ba asuntu seguransa sidadaun sira nian;
- s) Garante seguransa ba ema no sasan karik iha Inséndiu (ahi han), bee sai, rai monu, rai nakadoko, no iha situasaun hotu-hotu ne'ebé apresenta perigu ba ema no sasan;
- t) Kolabora hodi hala'o onra Estadu nian;

u) Kolabora no fó apoiu ba SNI kona-ba prevensaun no kombate ba asaun kontra orden institusionál ne'ebé estabelese no kontra órgaun ne'ebé eleitu tuir prosesu Demokrátiku.

v) Kolabora no fó apoiu ba F-FDTL kona-ba defeza soberania nasional no integridade territoriál;

w) Hala'o poder seluk ne'ebé iha lei.

### **Artigu 3º Medida Polísia nian**

1. Bainhira hala'o poder sira ne'ebé iha ámbitu kompeténsia nian, PNTL iha uza eskuzivu ba medida ne'ebé preve tuir lei no aplikavel tuir Konstituisaun no lei, liu-liu:

a) Ezije identifikaun husi ema ne'ebé deit maka iha ka la'o iha fatin públiku ka ema ne'ebé sujeitu ba vijilánsia polísia nian.

b) Vijilánsia ba ema no edificiu no establesimentu sira ba tempu ida ne'ebé determina;

c) Apreensaun temporáriu ba armas, Munisaun no Esplozivu;

2. Tuir kualidade nu'udar órgaun investigasaun kriminal, no tuir lei, PNTL hala'o funsaun iha autoridade Judisiál competente nia okos.

### **Artigu 4º Uzu forsa nian**

1. Tuir lei, PNTL bele uza forsa bainhira iha perturbasaun/laiha ba orden no trankuilidade /hakmatek públika, no bainhira laiha meius seluk ne'ebé suficiente hodi hasoru

rezisténsia ne'ebé la tuir lei, kontra membru PNTL, bainhira hala'o sira nia funsaun.

2. Forsa bele uza deit hodi defende an ka hodi defende ema seluk, hodi hasoru hahalok ne'ebé agresivu no kontra lei ka kontra integridade física membru PNTL ka sidadaun seluk nian
3. Forsa ne'ebé uza tenke forsa minimu ne'ebé nesesáriu hodi estabese fila fali orden lejítima no tenke proporsionál ba ameasa ne'ebé hasoru.
4. PNTL labele halo restrisaun ka uza meus atu obriga ka ameasa bainhira la iha nesesidade.
5. PNTL bele uza armamentu tuir konseitu uzu nian no nesesidade operasionál ida-idak nian, ne'ebé modelu no calibre define iha diploma ne'ebé Governu sei aprova.
6. Membru sira PNTL labele iha sira nia kilat privadu rasik

#### **Artigu 5º**

##### **Armamentu no Uniforme sira**

1. Membru sira PNTL nian, atu kumpre ho sira nia misaun, sei uza armamentu ne'ebé fahe ba sira.
2. Bainhira la tama servisu, membru PNTL proibidu atu lori armas ne'ebé fahe ba sira, armas hirak ne'e tenke halibur hodi rai iha fatin ne'ebé apropriadu iha unidade ka eskuadra iha ne'ebé koloka membru.
3. Membru sira PNTL nian iha direitu atu uza uniforme no insignia PNTL nian tuir regulamentu kona-ba asuntu ne'e.

#### **Artigu 6º** **Ierarkia**

Kategoria, sub-kategoria no postu iha ne'ebé fahe membru PNTL sira ba iha grupu tuir ierarkia maka tuir mai:

- a) Ofisiál sira, inklui ofisiál superior, ho postu Komisáriu, Superintendente Xefe, Superintendente no Asistente Superintendente; Ofisiál Inspetór sira ne'ebé inklui postu Inspetór Xefe, Inspetór no Inspetór Asistente;
- b) Sarjentu sira, ne'ebé inklui postu Sarjentu Xefe, Primeiru Sarjentu no Sarjentu;
- c) Ajente sira, ne'ebé inklui Ajente Xefe, Ajente Prinsipál no Ajente.

#### **Artigu 7º**

##### **Autoridade no Órgaun sira Polísia nian**

1. Iha nia área legal kompeténsia nian, autoridade polísia nian maka elementu sira ne'ebé iha funsaun polísia no hala'o funsaun komandu nian, liu-liu:
  - a) Komandante-Jerál PNTL;
  - b) 2º Komandante-Jerál PNTL;
  - c) Komandante Distrital PNTL;
  - d) Komandante Unidade Espesiál Polísia nian;
  - e) Komandante Unidade Marítima;
  - f) Komandante Unidade Patrullamentu Fronteira sira nian;
  - g) Komandante Operasaun PNTL;
  - h) Xefe Servisu Investigasaun kriminál;
  - i) Xefe Servisu Informasaun Polísia nian;
2. Maski la prejudika buat ne'ebé hakerek iha leten, elementu hotu-

hotu PNTL nian ne'ebé hala'ó funsaun polísia nian, konsidera nu'udar ajente autoridade no órgaun polísia krimínál.

3. Nu'udar órgaun polísia criminal nian, PNTL hala'ó nia servisu iha diresaun autoridade judisiária ne'ebé kompetente nia okos tuir Norma sira prosesu penal nian.
4. Dependénsia funksionál (depende ba hodi bele la'ó) ne'ebé refere iha leten hala'ó maski la prejudika organizasaun ierárkiku PNTL nian.

### **Artigu 8º**

#### **Dever atu Komparese**

Naran ema ne'ebé simu notifikasaun ka husi PNTL ka PNTL bolu, tenke komparese iha loron, oras no fatin ne'ebé dezinadu, tuir pena responsabilidade dixiplinár no krimínál, no tuir termu sira lei nian.

## **KAPÍTULU II**

### **Estrutura Orgánika**

#### **SEKSAUN I**

#### **Komandu PNTL Nian**

#### **ARTIGU 9º**

#### **Organizasaun**

Komandu PNTL inklui:

- a) Komandante Jerál;
- b) 2º Komandante Jerál;
- c) Órgaun ne'ebé fó pareser/konsellu no hala'ó inspesaun;
- d) Komandu Jerál;
- e) Unidade no Servisu sira;
- f) Komandu Distritál sira;
- g) Sentru Formasaun Polísia nian

### **Artigu 10º**

#### **Komandante Jerál**

1. Komandante Jerál PNTL nian Komisáriu ida ne'ebé hetan nomeasaun liu husi rezulusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian.
2. Komandante Jerál maka responsavel hodi kumpre misaun jerál PNTL nian.
3. Komandante Jerál iha kompeténsia espesiál atu:
  - a) Komandu, Jestaun, Administrasaun, kontrolu no inspesaun Órgaun, Komandu no Servisu sira PNTL nian;
  - b) Reprezenta PNTL;
  - c) Prezide (kaer) Konsellu Superior Polísia nian;
  - d) Garante ezelesaun atividade hotu-hotu ne'ebé iha relasaun ho organizasaun, meius no mekanizmu, operasaun sira, instrusaun sira no servisu tékniku, lojístika no administrativu PNTL nian;
  - e) Hodi koloka no transfere pesoál ho funsaun polísia no sivíl sira hodi hala'ó nesesidade servisu nian no garante katak kumpre ho ezijénsia sira regulamentu nian;
  - f) Hala'ó poder dixiplinár tuir Regulamentu Disiplina PNTL nian;
  - g) Fó orden hodi hala'ó inspesaun, inkeritu no investigasaun ba órgaun no servisu sira PNTL nian;
  - h) Promove ka halo proposta atu promove ofisiál sira PNTL nian, tuir Regime Karreira;
  - i) Simu responsabilidade ba atividade operasionál PNTL nian, hodi prezerva orden no

trankuilidade /hakmatek  
pública.

- j) Ezekuta desizaun Ministru ne'ebé responsavel ba Seguransa;
- k) Tuir lei, ezejuta kompeténsia sira ne'ebé delega husi Ministru ne'ebé responsavel ba Seguransa;
- l) Hala'o kompeténsia seluk ne'ebé relevante ba Komandante Jerál PNTL, ne'ebé hakerek iha lei.

- 4. Komandante Jerál hatan ba Ministru ne'ebé responsavel ba Seguransa;

**Artigu 11°**  
**2° Komandante Jerál**

- 1. 2° Komandante Jerál maka Komisáriu ne'ebé hetan nomeasaun liu husi Konsellu Ministru, tuir proposta husi Ministru ne'ebé responsavel ba seguransa hafoin simu pareser husi Konsellu Superior Polísia nian.
- 2. 2° Komandante Jerál iha kompeténsia atu:
  - a) Fó tulun ba Komandante Jerál atu hala'o nia funsaun;
  - b) Substitui Komandante Jerál bainhira nia auzente ka iha impedimentu ruma;
  - c) Halo proposta kona-ba promosaun ofisiál sira PNTL nian tuir Regime Karreira;
  - d) Halo proposta kona-ba transferénsia 2° Komandante Distrital sira no ofisiál subordinadu sira seluk nian;
  - e) Hala'o responsabilidade hirak ne'ebé delega ba nia ka hirak ne'ebé Komandante Jerál sub delega ba nia;
  - f) Hatan ba Komandante Jerál.

**SEKSAUN II**  
**Órgaun**

**Artigu 12°**  
**Órgaun Asesória No Inspesaun**  
**(Órgaun ne'ebé fó pareser/konsellu**  
**no hala'o inspesaun )**

Órgaun Asesória no Inspesaun maka:

- a) Konsellu Superior Polísia;
- b) Gabinete Inspesaun Jerál.

**Artigu 13°**  
**Konsellu Superior Polísia nian**

- 1. Konsellu Superior Polísia nian maka órgaun ne'ebé komandante Jerál konsulta, maski sei la fó kompeténsia ba órgaun ne'e atu foti desizaun.
- 2. Membru sira Konsellu Superior Polísia nian maka:
  - a) Komandante Jerál, ne'ebé sei prezide;
  - b) 2° Komandante Jerál;
  - c) Inspetór Jerál;
  - d) Komandante Operasaun nian;
  - e) Komandante Administrasaun nian;
  - f) Komandante Unidade Espesiál Polísia nian;
  - g) Komandante Unidade Marítima;
  - h) Komandante Unidade Patrullamentu Fronteira sira nian;
  - i) Xefe Servisu Informasaun Polísia nian;
  - j) Xefe Servisu Investigasaun Polísia nian;
  - k) Komandante Sentru formasaun Polísia nian;
  - l) Komandante Distrital sira.
- 3. Konsellu Superior Polísia nian sei iha enkontru ordináriu kada fulan

- neen no iha enkontru estraordináriu bainhira Komandante Jerál konvoka ka bainhira 1/3 husi membru sira husu, hodi diskute asuntu dixiplinár ka asuntu sira kona-ba estadu profisionál membru PNTL sira nian.
4. Bainhira hala'ó Sesaun Konsellu Superior Polísia nian sei elabora ata ne'ebé halo rezumu ba kestaun ne'ebé apresenta no desizaun ne'ebé foti, inklui mós rejistu kona-ba prezensa membru sira ne'ebé tuir enkontru no rezultadu votasaun nian bainhira desizaun ne'ebé foti la iha konsensus.
  5. Konsellu superior Polísia nian sei iha responsabilidade hodi fó pareser kona-ba:
    - a) Nomeasaun Komandante Jerálno 2º Komandante jerál nian;
    - b) Asuntu kona-ba kondisaun servisu no pesoál nian, liu-liu kona-ba defínisaun estatutu profisionál no ba sistema salarial;
    - c) Kondisaun ne'ebé hala'ó atividade policiamentu nian ho relasaun ba servisu ne'ebé hala'ó ba populasaun;
    - d) Planu formasaun nian, nesesidade no objektivu ba kursu hirak ne'ebé Sentru formasaun Polísia nian atu dezenvolve;
    - e) Aplika sansaun dixiplinár reforma obrigatóriu nian no demisaun ba membru PNTL nian;
    - f) Fó kondekorasaun;
    - g) Asuntu importante seluk kona-ba dixiplina, ka kona-ba PNTL, tuir pedidu husi Ministru ne'ebé responsavel ba Seguransa.
  6. Konsellu Superior Polísia nian so bele hala'ó debate bainhira iha prezensa pelumenus 2/3 husi membru iha enkontru. Desizaun sira konsellu nian prezisa hetan maioria hodi sai obrigatóriu.
  7. Bainhira votasaun iha empate, Prezidente konsellu nian maka sei vota hodi foti desizaun.
  8. Konsellu Superior Polísia nian maka iha kompeténsia atu elabora proposta kona-ba rejimentu internu, ne'ebé Ministru Defeza no Seguransa sei aprova.

#### **Artigu 14º**

##### **Gabinete Inspesaun Jerál**

- 1) Gabinete Inspesaun Jerál, hatan direktamente ba Komandante Jerál. Gabinete Inspesaun Jerál iha kompeténsia hodi hala'ó auditoria interna ba área operasionál, administrativu, finanseiru, dixiplinár no tékniku, no iha mós responsabilidade hodi halo verifikasaun, avaliasaun, investigasaun no relatóriu kona-ba dezempeñu servisu no atividade hotu-hotu PNTL nian.
- 2) Responsabilidade sira Gabinete Inspesaun Jerál inklui:
  - a) Inspesaun, auditoria no kontrola atividade hotu-hotu PNTL nian; Avaliasaun kona-ba legalidade, regularidade, efikásia no efisiénsia atividade operasionál nian;
  - b) Avaliasaun kona-ba legalidade no regularidade administrativu kona-ba jestaun pesoál nian;
  - c) Verifika katak tuir; planu atividade, desizaun ne'ebé foti no instrusaun internu; Hahu inkeritu no prosedimentu dixiplinár;

- d) Estuda, halo proposta no koordena medida hirak ne'ebé iha relasaun ba administrasaun dixiplina nian no asuntu hirak ne'ebé iha relasaun ba kondekorasaun no avaliasaun hirak ne'ebé buka atu estandardiza prosedimentu sira;
  - e) Organiza no fô informasaun kona-ba prosesu hirak ne'ebé iha relasaun ba kondekorasaun no avaliasaun tuir regulamentu ne'ebé relevante;
  - f) Implementa desizaun Komandante Jerál nian kona-ba étika no dixiplina;
  - g) Halo avaliasaun no relatóriu ba Komandante Jerál kona-ba, fixa hirak ne'ebé iha relasaun ba violasaun dixiplinár, inklui mós rekursu hirak ne'ebé la halo parte ba kompeténsia Komandante Distrital ka Unidade Espesiál nian; no
  - h) Halo avaliasaun no relatóriu ba Komandante jerál kona-ba, Asidente hirak ne'ebé hakanek membru sira PNTL nian bainhira hala'o servisu.
- 3. Komandante Jerál maka nomeia Superintendente Xefe ida hodi kaer xefia Gabinete Inspesaun Jerál.
  - 4. Gabinete Inspesaun Jerál sei koordena ho Gabinete auditoria no Inspesaun, ne'ebé estabelese liu husi Artigu 38 Dekretu –Lei no. 31/2008 Lei Orgánika Ministériu Defeza no Seguransa.

### **Seksaun III Komandu Jerál**

#### **Artigu 15° Lokalizasaun no Kompozisaun (Fatin no Kompozisaun)**

Komandu Jerál lokaliza iha Dili no kompostu husi:

- a) Komandu Operasaun
- b) Komandu Administrasaun
- c) Gabinete Komandante Jerál
- d) Gabinete Interpol
- e) Departamentu Justisa

#### **Artigu 16° Komandu Operasaun**

1. Komandu Operasaun kompostu ho órgaun hirak tuir mai :

- a) Sentru Nasionál Operasaun
- b) Departamentu Polisiamentu Komunitáriu
- c) Departamentu Tránzitu no Seguransa Rodoviária
- d) Departamentu Armas no Esplozivu nian.

2. Komandante Komandu Operasaun maka Superintendente Xefe ne'ebé hetan nomeasaun liu husi despaxu Komandante Jerál nian no hatan direktamente ba Komandante Jerál, nia iha kompeténsia atu:

- a) Diriji no koordena atividade husi órgaun hirak ne'ebé temi iha N° 1 artigu ida ne'e nian.
- b) Liu husi Sentru Nasionál Operasaun, halo koordenasau ba atividade operasionál iha ámbitu nasionál, ka hirak ne'ebé envolve liu Unidade ka Komandu Distrital ida;

#### **Artigu 17° Sentru Nasionál Operasaun**

- 1) Sentru Nasionál Operasaun maka estrutura Komandu Jerál nian ne'ebé responsavel ba Sentru Permanente Komunikasaun nian no ba Planeamentu Operasaun Polísia nian.
- 2) Sentru Nasionál Operasaun nia misaun maka:



- a) Mantein ligasaun ho sentru operasionál sira iha Distritu;
- b) Halo planu no hala'o operasaun polisia nian iha ámbito nasional, ka bainhira envolve liu Unidade ka Komandu Distrital ida;
- c) Halibur no analiza dadus ne'ebé iha relasaun ho atividade operasionál;
- d) Hala'o estudu tékniku ne'ebé relevante ba atividade polisia nian;
- e) Simu responsabilidade ba seguransa no integridade ba informasaun ne'ebé transmite liu husi rede komunikasaun PNTL nian;
- f) Asegura ligasaun ba Sentru Jestaun krize nian.

#### **Artigu 18º**

##### **Departamentu Polisiamentu Komunitáriu**

Departamentu polisiamentu komunitáriu maka unidade ida iha Komandu Nasionál nia laran ne'ebé iha Misaun espesífika hanesan tuir mai:

- a) Tuir kolaborassun ho Sentru Formasaun Polisia nian, defini nesiedade no programa instrusaun ba servisu espesializadu polisiamentu komunitáriu nian;
- b) Elabora Estudu, pareser, programa no atividade sira ne'ebé Komandu Distritál sira atu dezenvolve hamutuk ho populasaun;
- c) Halo publisidade kona-ba knaar no misaun PNTL nian iha comunidade nia let;
- d) Fó apoiu ba Komandu Distrital hodi estabelese relasaun ho estrutura sira

iha comunidade nia laran;

- e) Hala'o tarefa seluk ne'ebé monu iha ámbito misaun nian, nia laran.

#### **Artigu 19º**

##### **Departamentu Tránsito no Seguransa Rodoviária**

Departamentu Tránsito no Seguransa Rodoviária, halo parte Komandu Jerál nian no iha misaun espesífiku hirak tuir mai:

- a) Tuir kolaborasaun ho Sentru formasaun Polisia nian, defini nesiedade no programa instrusaun ba servisu espesializadu tránsito no seguransa rodoviária nian;
- b) Elabora estudu, pareser, programa no atividade sira ne'ebé iha relasaun ho seguransa rodoviária no halo desiminasun hamutuk ho Komandu Distritál sira;
- c) Dezenvolve Kompañia seguransa rodoviária no eduka sidadaun sira atu respeita lei rodoviária;
- d) Halo kolaborasaun ho autoridade competente sira kona-ba definisaun ba sinál no markasaun iha dalan no garante katak sira hala'o sira nia servisu;
- e) Hala'o knaar seluk ne'ebé monu iha ámbito misaun, nia laran.

#### **Artigu 20º**

##### **Departamentu Armamentu no Esplozivu sira**

Departamentu Armamentu no Esplozivu nian iha Komandu Jerál nia laran, no iha funsaun espesífiku hirak tuir mai:

- a) Fó pareser kona-ba kompeténsia ema hirak ne'ebé husu lisensa hodi uza no lori kilat, tuir lei ne'ebé iha vigór;
- b) Garante katak armas, munisaun no Esplozivu sira ne'ebé prende, rai tuir ámbitu lejizlasaun ne'ebé aplika;
- c) Fó apoiu hodi hala'o inspesaun hirak ne'ebé garante katak kumpre ho lei no regulamentu relevante sira, liu-liu kona-ba produsaun, importaun, esportaun, komérsiu, transporte no uzu armas no Esplozivu nian;
- d) Liu husi koordenaun ho forsa polisia lokál, ezamina no investiga fatin no ekipamentu bainhira iha insidente ne'ebé envolve armas ka esplozivu sira;
- e) Organiza no mantein sistema rejistu ba arma hirak autorizadu;
- f) Atividade seluk ne'ebé monu iha ámbitu misaun nian.

#### **Artigu 21°**

##### **Komandu Administrasaun**

- 1) Komandu Administrasaun maka órgaun ne'ebé halo parte iha Komandu Jerál nia laran, no nu'udar misaun tenke hala'o atividade sira kona-ba Administrasaun, Finansas, Lojístika, Disiplina, no Jestaun Rekursus Umanus PNTL nian.
- 2) Komandante Komandu Administrasaun Superintendente Xefe ne'ebé hetan nomeasaun liu husi despaxu Komandante Jerál, no hatan direktamente ba Komandante Jerál.
- 3) Komandu Administrasaun kompostu ho Departamentu hirak tuir mai:

- a) Departamentu Administrasaun no Planeamentu;
  - b) Departamentu Finansas no Orsamentu;
  - c) Departamentu Lojístika;
  - d) Departamentu Rekursus Umanus.
- 4) Departamentu sira fahe ba Seksaun no Sub Seksaun hodi iha efikásia boot liu Ba servisu.
  5. Deskrisaun detalladu kona-ba funsaun sira iha Departamentu, Seksaun no Sub Seksaun ida-idak, hakerek iha rejimentu internu Komandu Administrasaun nian, ne'ebé sei aprova liu husi despaxu husi Ministru ne'ebé responsavel ba Seguransa, tuir proposta husi Komandante Jerál, hafoin rona Komandante Administrasaun.

#### **Artigu 22°**

##### **Gabinete Komandante Jerál**

Gabinete Komandante jerál fó apoiu direktamente ba Komandante Jerál kona-ba tarefa hirak ne'ebé Komandante Jerál determina, no Gabinete ne'e kompostu ho Xefe Gabinete ida, no sekretariu no asistente administrativu sira hodi hala'o funsaun ne'ebé iha.

#### **Artigu 23°**

##### **Gabinete Interpol**

1. Gabinete Interpol depende direktamente ba Komandante jerál no nia misaun prinsipál maka atu fasilita kooperasaun no apoiu entre PNTL no polisia sira husi nasaun seluk, liu husi koordenaun ho Ministériu Negosiu Estranjeiru.
2. Gabinete Interpol maka pontu kontaktu ba Sekretariu Jerál

Interpol nian, gabinete rejionál sira nian no nasaun seluk ne'ebé presiza apoiu kona-ba investigasaun Internasionál, no hodi lokaliza no kaptura fujitivu sira. *(hetan no prende ema ne'ebé halo krime no halai)*

**Artigu 24°**  
**Departamentu Justisa**

Departamentu Justisa PNTL nian depende direktamente ba Komandante Jerál no nia misaun prinsipál maka atu fasilita no fó apoiu jurídiku no mós elabora prosesu ba Unidade, Servisu no Komandu sira, maski la prejudika kompeténsia dixiplinár ne'ebé fó ba Komandante sira husi diviza oin-oin.

**Seksaun IV**  
**Unidade no Servisu sira**

**Artigu 25°**  
**Kompozisaun**

Unidade no Servisu sira PNTL nian maka:

- a) Unidade Espesiál Polísia nian;
- b) Unidade Marítima;
- c) Unidade Patrullamentu Fronteira sira nian;
- d) Servisu Informasaun Polísia nian;
- e) Servisu Investigasaun Kriminál.

**Artigu 26°**  
**Unidade Espesiál Polísia nian**

1. Unidade Espesiál polísia, nian unidade rezerva ida ne'ebé Komandante Jerál maka komanda, no kaer komandu operasionál, no iha kapasidade hodi:

- a) Mantein no estabeselese fila fali orden públika;
- b) Rezolve no jere insidente krítiku;
- c) Halo intervensaun ho tática bainhira iha situasaun ne'ebé iha Violénsia, perigu boot liu, kompleksu liu ka risku boot liu;
- d) Halo seguransa ba instalasaun ne'ebé sensível no ba eventu boot sira, no protesaun ba entidade boot sira;
- e) Dezativa esplozivu sira;
- f) Protesaun no sokorru
- g) Prepara no haruka forsa ba misaun internasionál.

- 2. Komandante Unidade Espesiál Polísia nian, Superintendente Xefe ida ne'ebé hetan nomeasaun liu husi despaxu husi Komandante Jerál, no iha membru PNTL ne'ebé iha formasaun espesializadu.
- 3. Unidade Espesiál polísia nian reforsa komandu Distritál sira hodi hala'o funsaun ne'ebé sira simu bainhira sira nia kapasidade la to'o ka bainhira natureza ameasa ka konflitu ezije.
- 4. Unidade Espesiál polísia nian kolabora ho Forsa Armada iha misaun sira ne'ebé preve iha sistema integradu Seguransa Nasionál nian, ne'ebé defini iha Lei Seguransa Nasionál, liu-liu kona-ba vijilánsia no kontrolu Fronteira terrestre nian, bainhira hatan ba dezastre no kalamidade natural no iha situasaun seluk ne'ebé justifika katak uza forsa konjunta,

liu-liu bainhira iha ameasa revolta kontra Estadu Direitu nian.

- 5) Unidade espezial polisia nian halo kolaborasaun ho sentru formasaun polisia , hodi define nesesidade no programa instrusaun ba espesialidade sub unidade sira nian

**Artigu 27°**  
**Organizasaun Unidade Espezial Polisia nian**

Unidade Espezial Polisia iha nia sede iha Dili, no organiza hanesan tuir mai:

- a) Komandante;
- b) 2° Komandante;
- c) Batallaun Orden Públika nian;
- d) Kompañia Seguransa Pesoál nian;
- e) Kompañia Operasaun Espezial;
- f) Pelotaun Apoiu no Servisu nian

**Artigu 28°**  
**Batallaun Orden Públika**

Batallaun Orden Públika, sub unidade ida ne'ebé konstitui husi kompañia operasaun nian rua, no nu'udar misaun prinsipál tenke hatan ba mudansa grave iha orden públika, seguransa pontu sensivel nian no reforsa Forsa iha territóriu nasional tomak.

**Artigu 29°**  
**Kompañia Seguransa Pesoál**

Kompañia Seguransa Pesoál, sub unidade ida no nu'udar misaun prinsipál tenke fó seguransa pesoál ba entidade boot sira, nasional no estranjeiru ne'ebé vizita Timor-Leste.

**Artigu 30°**  
**Kompañia Operasaun Espezial**

1. Kompañia Operasaun Espezial, sub unidade ida ho kapasidade espezial hodi lidera bainhira iha situasaun ho Violénsia makas, hodi bele hatan ba aktu terrorismu ka asaun armada ruma, hodi liberta refen (*ema ne'ebé prezu iha krime ida*) no hodi evakua no hamoos instalasaun ne'ebé okupadu husi grupu sira ne'ebé perigozu.

2. Kompañia Operasaun Espezial iha seksaun ida hodi dezativa esplozivu.

**Artigu 31**  
**Pelotaun Apoiu no Servisu nian**

Pelotaun Apoiu no Servisu nia misaun prinsipál maka atu hala'o servisu administrativu hotu-hotu no fó apoiu ba funsionamentu unidade nian

**Artigu 32**  
**Unidade Marítima**

1. Unidade Marítima forsa ne'ebé iha kompeténsia espesializadu Polisia Marítima nian, ne'ebé integra ba sistema Autoridade Marítima no iha formasaun espezial hodi halo vijilánsia no fiskalizaun ba fronteira kosteira no iha área hirak ne'ebé designadu nu'udar dominiu públiku marítimu nian.
2. Superintendente ida, ne'ebé nomeia husi Komandante Jerál maka komanda Unidade Marítima, no iha membru PNTL ho formasaun espesializadu ne'ebé integradu no tuir ámbitu autoridade marítima iha misaun atu:

- a) Prevene no hamenus krime, liu-liu kona-ba luta kontra tráfikú droga nian, peska ilegal, tráfikú umanu,

- |   |   |
|---|---|
| <p>terrorismu no pirata nian;</p> <p>b) Prevene no hamenus imigrasaun klandestina;</p> <p>c) Seguransa área kosteira nian no dominiu (área) públiku marítimu nian;</p> <p>d) Halo fiskalizaun, prezerva no proteje ambiente tasi nian, rekursu natural no patrimóniu iha tasi okos;</p> <p>e) Prevene no luta kontra poluisaun iha tasi;</p> <p>f) Proteje ema nia moris iha tasi no salva ema iha tasi;</p> <p>g) Protesaun Sivíl ho foku ba tasi no ba área kostal;</p> <p>h) Protesaun saúde públiku nian;</p> <p>i) Hala'o vijilánsia iha fronteira marítima tomak, liu husi koordenasaun no kooperasaun ho autoridade no entidade seluk ne'ebé integra iha sistema Autoridade Marítima, liu-liu ho komponente Naval F-FDTL nian;</p> <p>j) Liu husi kolaboraun ho Sentru Formasaun Polísia nian, defini nesidade no programa instrusaun ba especialidade espesífiku sira;</p> <p>k) Tarefa seluk ne'ebé tuir natureza misaun nian no simu legalmente, iha âmbito Sistema Autoridade Marítima nian.</p> | <p>vijilánsia ba fronteira no kontrola ema no sasan.</p> <p>2. Superintendente ida ne'ebé hetan nomeasaun husi Komandante Jerál maka kaer komandu Unidade patrullamentu Fronteira nian, no unidade ne'e kompostu husi membru efektivu iha território nia laran, ne'ebé koloka tuir rejime rotasaun, ba tempu ne'ebé Ministru ne'ebé responsavel ba Seguransa sei determina.</p> <p>3. Rejime rotasaun aplika mós ba Komandante Unidade Patrullamentu Fronteira sira nian</p> <p>4. Misaun espesífika Unidade Patrullamentu Fronteira nian maka:</p> <p>a) Patrullamentu no vijilánsia ba fronteira terrestre tomak, liu husi koordenasaun no kooperasaun ho F-FDTL;</p> <p>b) Koopera ho Servisu Migrasaun hodi kontrola ema no bens ne'ebé tama no sai liu husi fronteira terrestre;</p> <p>c) Koopera ho autoridade administrativa seluk ne'ebé relevante hodi kumpre ho lei fiskal, alfândega no sanitáriu nian;</p> <p>d) No seluk tan tuir natureza misaun no hirak ne'ebé simu tuir dalan ne'ebé legal.</p> |
|---|---|

**Artigu 33°**

**Unidade Patrullamentu Fronteira nian**

1. Unidade Patrullamentu Fronteira iha kapasidade espesial hodi hala'o

**Artigu 34°**

**Servisu Informasaun Polísia nian**

1. Nu'udar misaun espesífika, Servisu informasaun polísia nian, tenke elabora no asegura dezvoltamentu no

- manutensaun sistema informasaun operasionál polísia nian.
2. Superintendente Xefe ida ne'ebé hetan nomeasaun liu husi despaxu Komandante Jerál nian maka kaer komandu Servisu Informasaun Polísia nian, no iha misaun atu:
    - a) Liuhusi kolaborasaun ho Sentru formasaun Polísia nian defini nesiedade no programa instrusaun ba especialidade informasaun nian;
    - b) Defini Norma tékniku sira ne'ebé iha relasaun ho peskiza, halibur no analiza notisia no dados ne'ebé iha interese ba PNTL;
    - c) Hala'o estudu, selesaun, prosesu no arkivu ba notisia ne'ebé iha interese ba polísia;
    - d) Hamutuk ho autoridade seluk polísia nian, elabora relatóriu kona-ba nivel krime no delinkuénsia;
    - e) Halo kooperasaun iha nivel internasionál liu husi koordenaun ho Ministériu Negosiu Estratejiru, no ho servisu polísia seluk hodi fó no simu informasaun kona-ba seguransa;
    - f) Halo kooperasaun ho Servisu Nasionál Intelijénsia nian no ho Servisu Informasaun Militar F-FDTL nian, tuir termu ne'ebé defini iha Lei Sistema Nasionál Intelijénsia RDTL nian;
    - g) Tarefa seluk ne'ebé tuir natureza misaun no hirak ne'ebé simu tuir lei.

3. Servisu Informasaun Polísia nian iha kompeténsia atu organiza no mantein sentru no baze de dados, no tuir termus ne'ebé defini iha lei, bele hetan fiskalizaun.

### **Artigu 35°**

#### **Servisu Investigasaun Kriminál**

1. Servisu Investigasaun Kriminál iha misaun espesífika atu hala'o investigasaun no prevene krime no hala'o instrusaun husi autoridade Judisial ne'ebé competente, tuir lei ne'ebé iha, maski la prejudika dependénsia ierarkika PNTL nian.
2. Superintendente Xefe ne'ebé hetan nomeasaun liu husi despaxu Ministru nian maka kaer komandu Servisu Investigasaun kriminál hodi hala'o tarefa hirak tuir mai:
  - a) Halo kolaborasaun ho Sentru formasaun Polísia nian hodi defini nesiedade no programa instrusaun ne'ebé espesializadu ba investigasaun kriminál;
  - b) Investiga no hala'o instrusaun hodi prepara prosesu hirak ne'ebé iha relasaun ho krime ne'ebé komún
  - c) Bainhira entidade competente husu ka delega, hala'o investigasaun no hala'o instrusaun hodi prepara prosesu ka kolabora iha atividade hirak ne'ebé iha relasaun ho krime seluk;
  - d) Halo vijilánsia ba indivíduu hirak ne'ebé suspeita, tau matan ba

no kontrola atividade no fatin suspeitu ka fatin ne'ebé fó vantajen hodi prepara ka hala'o krime, hodi uza rezultadu husi krime ka hodi subar ema kriminozu sira;

- e) Tarefa seluk tuir natureza misaun, no hirak ne'ebé simu tuir lei.
3. Autoridade no ajente sira investigasaun nian iha entrada livre (tama la selu) ba fatin ne'ebé hala'o espektákulu, ba área portuaria, ba naviu hirak ne'ebé atraka para) iha portu ka para iha bee ne'ebé iha território nasionál, iha aeroportu no iha aviaun hirak ne'ebé para iha território nasionál, iha sede asosiasaun sira nian no iha fatin hotu-hotu ne'ebé hala'o enkontru públiku ka iha fatin ne'ebé públiku tenke selu ka hatudu billete ne'ebé sosa hodi tama.
4. Autoridade no ajente polisia ne'ebé hala'o misaun investigasaun kriminál, bele hafoin identifika an no independente husi formalidade seluk, tama iha estabelesimentu komersiál, industriál, prizaun ka asisténsia nian, no mós iha hotel, pensaun, armazein, repartisaun públika ka iha instalasaun seluk ne'ebé laiha natureza nu'udar uma partikular ida.
5. Autoridade no ajente polisia ne'ebé hala'o misaun investigasaun kriminál, hala'o sira nia funsaun tuir diresaun husi autoridade judisiária kompetente, no konforme ho Norma sira prosesu penal nian.

**Seksaun V**  
**Komandu Distrital sira**

**Artigu 36°**  
**Komandu no Misaun**

1. Komandu Distritu sira nian maka unidade territoriál PNTL nian, ho fatin iha Distritu sira no subordinadu diretu Komandante Jerál nian.
2. Ofisiál Superior ho patente Superintendente Xefe ka Superintendente, ne'ebé hetan nomeasaun liu husi despaxu Komandante Jerál nian hafoin simu proposta husi 2° Komandante maka komanda iha Komandu Distritu nian.
3. Komandante Distrital sira simu tulun husi 2° Komandante ne'ebé iha patente Superintendente ka Superintendente Xefe ne'ebé hetan nomeasaun liu husi despaxu Komandante Jerál nian hafoin simu proposta husi 2° Komandante Jerál.
4. Misaun Komandu Distritu nian hanesan ho misaun jerál PNTL nian, iha área respektiva asaun nian.

**Artigu 37°**  
**Organizasaun**

1. Komandu Distritál sira kompostu husi unidade hirak tuir mai:
  - a) Seksaun Operasaun no Informasaun nian ida;
  - b) Sekretaria Administrativa nian ida;
  - c) Seksaun tránzitu no seguransa rodoviária nian ida;
  - d) Seksaun Investigasaun Kriminál nian ida;
  - e) Seksaun Justisa nian ida;
  - f) Forsa Rezerva nian ida;
2. Bainhira dimensaun no karakterístika área nian justifika, komandu distritu sira iha eskuadra

iha nivel sub-Distritu nian, membru PNTL ho kategoria Ofisiál Inspetór ka Sarjentu ne'ebé simu nomeasaun liu husi despaxu 2° Komandante Jerál nian, hafoin simu proposta husi Komandante Distritu ida-idak nian maka komanda no hala'o funsaun oin-oin tuir dimensaun (boot halo nu'usá) no kompleksidade.

3. Efektivu iha eskuadra kompostu ho pesoál husi polisiamentu komunitáriu, no bainhira sirkunstánsia ezije simu apoiu no reforsa husi seksaun seluk ne'ebé hamutuk forma Komandu Distritál.

4. Eskuadra sira bele loke Postu Polisia nian iha Suco sira bainhira iha dimensaun no karakterístika ne'ebé bele justifika.

**Artigu 38°  
Kompeténsia sira**

1. Kompeténsia sira Komandante Distrital nian maka:

- a) Representa PNTL iha nivel Distritu nian;
- b) Hala'o komandu forsa hotu-hotu PNTL nian iha ámbitu área asaun ida-idak nian.
- c) Halo proposta ba nomeasaun Komandante Eskuadra no nomeia Komandante Postu sira nian no Xefe Seksaun no servisu seluk nian, ne'ebé konstitui Komandu Distritál;
- d) Hala'o poder dixiplinár tuir Regulamentu Dixiplinár;

- e) Halo transferénsia no alokasaun ba membru PNTL sira ne'ebé iha Komandu Distritál nia laran;
- f) Halo promosaun ba planeamentu administrativu no operasionál Komandu Distritál nian, tuir planu nasional PNTL nian;
- g) Dirije no tau matan ba atividade finanseiru hotu-hotu tuir lei;
- h) Estabelese planu kontinjénsia karik iha perigu ka ameasa ba seguransa no orden públika;
- i) Halo kooperasaun ho autoridade kompetente seluk, hodi estabelese planu kontinjénsia ba situasaun dezastre ka kalamidade públika;
- j) Halo kolaborasaun tuir poder PNTL nia laran ho autoridade sira administrasaun, judisiária, militar no seguransa;
- k) Koopera ho estrutura komunitária no ho autoridade relijiaun sira kona-ba promosaun orden no seguransa públika nian;
- l) Hala'o kompeténsia hirak ne'ebé Komandante Jerál delega ba nia.



2. Kompeténsia sira 2º Komandante Distritál nian maka:

- a) Substitui Komandante Distritál bainhira komandante Distritál auzente (la iha) ka iha impedimentu (obstákulu) ruma
- b) Hala'õ kompeténsia hirak ne'ebé Komandante Distritál delega no fó informasaun beibeik ba Komandante Distritál kona-ba atividade ne'ebé hala'õ.

**Seksaun VI**

**Sentru formasaun Polísia nian**

**Artigu 39º**

**Misaun no Kompeténsia sira**

1. Sentru Formasaun Polísia nian maka eskola PNTL nian ne'ebé iha kapasidade espesial hodi fó formasaun moral, kultural, fizika no tékniku-profisionál ba ofisial, Sarjentu no ajente sira, no mós hodi atualiza, espesializa no fó valór ba sira nia koñesimentu.
2. Liu husi despaxu, Komandante Jerál nomeia superintendente Xefe ida hodi Komanda Sentru formasaun Polísia nian.
3. Sentru Formasaun Polísia nian maka responsavel hodi elabora sistema hanorin ba PNTL, ne'ebé inklui kursu formasaun, kursu espesializasaun, kursu atualizasaun no kursu promosaun ba kategoria no postu sira.
4. Sentru formasaun Polísia nian maka responsavel hodi organiza no

hala'õ kursu hirak ne'ebé refere iha leten no dezenvolve kurríkulu no programa ba ida-idak.

5. Sentru Formasaun Polísia nian maka iha kompeténsia atu halo proposta ba no prepara planu anuál asaun ba formasaun, ho hanoin ba objektivu no nesesidade jerál no espesífiku unidade sira PNTL nian.
6. Sentru formasaun Polísia nian sei koordena ho Ministériu Justisa hodi halo programa Kursu Investigasaun Kriminál nian.
7. Sentru Formasaun Polísia nian tuir regulamentu rasik, ne'ebé sei aprova iha Konsellu Ministru, ne'ebé defini estrutura formadór sira nian, perfil planu kurríkulu nian, sertifikasaun formasaun, avaliasaun no validasaun treinu nian no mós Koordenasaun ho Ministériu Edukasaun no Ministériu administrasaun Estatál, kona-ba asuntu ne'ebé refere ba konteúdu kursu sira ne'ebé bele iha koñesimentu sivíl.

**Kapítulu III**

**Dispozisaun Diversu**

**Artigu 40º**

**Regulamentasaun**

Regulamentu servisu jerál no regulamentu seluk ne'ebé nesesáriu hodi hala'õ órgaun sira ne'ebé halo parte iha estrutura PNTL nian, aprova liuhusi despaxu Ministru ne'ebé responsavel ba seguransa.

**Artigu 41º**

**Norma organizasaun no Prosedimentu**

1. Matéria kona-ba prosedimentu tékniku no administrativu ne'ebé PNTL bele atu adopta, no la afeta direitu sidadaun no la regula ho

diploma rasik, tenke iha Norma Organizasaun no prosedimentu (NOP), ne'ebé sei aprova liu husi despaxu Komandante Jerál.

2. Norma Organizasaun no Prosedimentu Norma ne'ebé membru no funsionáriu hotu-hotu iha PNTL obrigatóriu atu kumpre, no inklui iha Aneksu 1 no halo parte Lei ida ne'e nian.

**Artigu 42°**  
**Regulamentu Seluk**

Rejime dixiplinár, karreira no saláriu nian regula liuhusi diploma própriu ne'ebé aprova iha Konsellu Ministru.

**Artigu 43°**  
**Pesoál Sivil**

Pesoál sivil ne'ebé servisu iha PNTL tuir rejime ne'ebé preve iha lei jerál ba pesoál iha administrasaun públika.

**Artigu 44 °**  
**Kartaun Identifikasaun**

1. Ofisiál Sarjentu, Sarjentu no ajente sira PNTL nian uza kartaun identifikasaun ho modelu ne'ebé spesiál, ne'ebé sei aprova liuhusi despaxu Ministru ne'ebé responsavel ba seguransa, no obrigatóriu atu uza bainhira servisu no bainhira la servisu.
2. Kartaun identifikasaun ida ne'e sei la substitui dokumentu seluk identifikasaun obrigatóriu nian tuir lei ne'ebé iha vigór.

**Artigu 45°**  
**Bandeira Nasionál no Símbolu**

1. PNTL no nia Unidade sira iha direitu atu uza bandeira nasional,

ne'ebé hatudu deit kondekorasaun hirak ne'ebé sira simu.

2. Komandante jerál iha direitu atu uza gallardete

**Artigu 46°**  
**Data Komemorativa**  
**(loron ne'ebé atu Komemora)**

Loron PNTL nian komemora iha loron 27 fulan Marsu, hodi komemora loron ne'ebé harii PNTL iha tinan 2000.

**Kapítulu IV**  
**Dispozisaun Finál**

**Artigu 47°**  
**Revogasaun**

Revoga Dekretu-Lei número 8/2004 loron 5 fulan Maiu.

**Artigu 48°**  
**Tama iha Vigór**

Diploma ida ne'e tama iha vigór loron ida hafoin Publikasaun

Aprova iha Konsellu Ministru, loron \_\_\_ fulan Dezembru 2008

Primeiru Ministru,

\_\_\_\_\_  
(Kay Rala Xanana Gusmão)  
Ministru Defeza no Seguransa

\_\_\_\_\_  
(Kay Rala Xanana Gusmão)  
Promulga iha loron 10 fulan 2, 2009

Públika.

Prezidente Repúblika nian,

\_\_\_\_\_  
(José Ramos Horta)